

地310.31
42
3
1/10



同安縣志

卷卅二人物錄獨行 卷卅三人物錄孝友 卷卅四
人物錄忠義 卷卅五人物錄循吏

同安縣志卷之三十二

獨行錄 附高士

孔子稱逸民謂天下之民歸心重獨行之士也洪崖創高蹈於上皇時代許由善卷不降節於唐虞之朝蓋隱居求志負貞亮之節以自放於山巔水涯間池沼足漁春稅代耕逸士高人古聖賢且嘖嘖稱道矣雖然真能以獨行稱未易言也昔皇甫謐作高士傳夷齊兩龔且不得錄執此以繩天下士尙難其詣况僅一邑耶究之春秋重子臧之節明堂月令亦以季春禮名士一節自堪千古固不必被衣王倪齧缺巢父亦可以風下此如型仁講讓見義勇爲與夫亮節高風足爲世範雖非極詣仍宜表彰因志獨行而以高士附焉

唐 謝 脩

宋 石 贇

明 陳真泰

黃 軫

池浴雲

同安縣志

卷之三十二

人物錄 獨行

柯 揚

蘇商霖

吳達一 郭榜

蔡 祚

洪居正

阮伯宗

紀許國

林志遠

李樹官

清 王士豫

吳曾芳

金 友

黃錫時

陳邦寶

魏秀才

陳必敬

胡乾篤

陳樸軒

傅 琪

黃朝緒

劉 恭

林 湍

洪 俊

李 璋

陳 俊

呂誠源

劉夢龍

劉紹豸

蔡鼎臣

葉振揚

林 牧

周仕慶

林 晃

周國賓

蔣懷忠

蘇思義

蘇震亨

池浴沂

王三聘

陳廷佐

李霖慰

黃蘭芳

張賁垣

莊 獻

蔡紹英

王高立

王 覲

鄭 師

阮旻錫

葉啟麤

葉 迎

紀文疇

紀保國

莊 潛

林 霍

陳則賡

楊期演

楊秉機

林嘉采

葉后詔

陳雲初

王 良

陳維衡

陳孝宗

王朝俊

蘇未觀

劉彭齡

陳御飛

陳王春

陳錫英

林芳德

周廷樑

呂文遇

李擎輝

陳夢熊

陳秉義

陳思敬

王瓊林

高育茂

童重器

陳廷振

顏丹書

張添

葉時泰

陳澧

曾鑄

蘇國鑄

胡鉉

顏文禡

唐

謝脩字升之有崎行自廣明西幸人多忍恥事北獨脩遁跡俟光啟回鑾迺出登文

德元年進士脩詞藻過人時輩推許所居之山因名文圃舊志

按謝脩舊志列諸外紀似於例未合泉州府志列諸列傳不為無見第考其事

蹟固高行者流也今特采入獨行傳

宋

石贊字蕃甫以世胄薄遊鯁論忤世浩然而歸崇寧中隱於文圃山詞藻清節推重

一時嘉定間邑人楊志為作三賢堂與謝脩洪文用合祀

魏秀才逸其名居浯江上有太上隱者之風邱葵贈詩二章其一屋茅蕭索泣寒蟲

獨自吟詩學已工敗葉能令溝水黑亂雲不放夕陽紅半生辛苦空儒服一歲蹉

跎又朔風不意窮鄉有奇事暮春得拜席門翁其二月淡蓬門掩候蟲窮通底解

問天工茶烹粟面紛紛白燈吐花心灼灼紅屢改新吟添硯水密糊舊稿護窗風

同安縣志

卷之三十二

人物錄 獨行二

相逢莫道龐公老覽鏡先慚似老翁舊志

陳必敬號樂所陽翟人少穎悟通五經諸子百家言宋末一舉不遇遂不復出嘗與

邱葵講明濂洛遺學所著有詩聯遺文其詠釣臺詩云公為名利隱我為名利來

羞見先生面黃昏過釣臺又云已上桐江臺又弄桐江釣不食桐江魚不怕嚴公

笑二詩人傳誦之

明

陳真泰字乾通舊志作乾道唐場老之後家富好施遇義舉必力為之與弟陽泰人呼為

二長者值歲饑出粟賑鄉里咸享實惠年九十五終曾孫華玖宏治舉人閩書府

乘氏家

胡乾篤父克裕有孝德偕妻雙壽至九十一歲乾篤事親孝謹好善行義成化辛丑

援例納票給冠帶造余塘溪橋以利行人既訖工請父母行橋上效舞綵戲鄉人

羨之於赤泥山立義冢修埋枯骨邑令龍越作忠義堂旌之子廷銘亦有孝行曾

孫明佐萬歷壬午舉人壬辰進士累官山東參政閩書府

陳樸軒陽翟人為經歷書記成化初大小嶝民以通夷內徙委經歷查勘樸軒極陳

嶠民此離狀代畫保全策經歷如指言之全活甚衆建祠勒石頌之

傅琪字質温號禾江少讀書了晰經史尤好通鑑能舉其首尾嘗讀至所記強項令而追歎之曰斯丈夫矣父年已老琪不辭筋力服賈爲養時時轉販米穀於漳泉閒時其貴賤爲往來不多取人直有多直輒舉還之有兄二人曰琮曰珍珍逮繫省獄琪橐餽以從力爲訟冤出之亡何珍客死福安人謂道遠火之便琪不從以櫬歸及父與長兄琮同日卒哀毀幾不欲生撫二孤姪恩養備至爲之有室子鎮幼穎慧勉之曰學則庶人之子爲公卿及十五歲爲諸生有文名又誠之曰文莫吾猶人也其當先士行及舉進士馳書示之曰幼學壯行此其時矣鎮歷官著清節俸餘無羨益心喜之邑令屢致鄉賓勉一就鄉有兄弟爭田者求琪居閒則將挈田相畀琪留與共酌反覆諭之曰辱君意誠厚顧君視予於兄弟孰戚哉何不以讓兄弟而獨畀予其人愧悔去遂敦好如初以子鎮貴封御史年八十而卒

黃朝緒字志理號廣堂賦性嚴厲治家勤勉經畫精密家故饒值中落奮然有恢復之志念父祖祀典未備割己業若干以爲祭田又規畫祠堂規制以遺後人嘗誨諸子曰心志萬事之綱心堅石穿志勁石軟男兒無志焉攸立哉又訓其子國濟

同安縣志

卷之三十二

人物錄 獨行三

曰爾讀書當如吾治稼播種芟耘必以時糞溉必以力則稼雖與人同所穫必與人異讀書亦如是又戒諸子保身守家之道歷舉積不善之有餘殃者以爲鑒人或負己則曰寧人負我毋我負人見人戚戚於貧富則曰不願大大富不願小小貧不願人求我不願我求人其言皆有道如此

節林次崖文集

黃軫字伯禽號質庵守真抱朴督僮僕耕種樹藝晝夜冒風露觸豺虎無畏阻履麓窮陵谷歷溝澗波池井塍不爲勞不數年大致豐裕性儉約布衣蔬食不事華美安常守分不作非爲賦役以時供億姓名不登官籍吏卒追呼鮮踵其門家無外事飢食渴飲夏嘲松風冬暄榆日呼童沃林果灌園蔬理籬菊興至牽獵犬逐驪鹿射雉兔客至設供具留飲投壺引白盡醉而散宗族鄉黨無怨姻親感其惠朋友服其信所謂一鄉之善士者

節林次崖文集

劉恭字大受號鐵山雄曾孫少孤奉母王氏以居諸父叵測利其業謀殄之恭幼卽多智遵母教潛形謹跡不踐禍機昏夜出入自防飲食心動輒不苟諸父知不可殄則漁奪其產耗之恭泣謂母曰他日兒能自有之勿與爭旣長娶於葉奉母僑居以避難自力於勞窶艱躓中忍閔耐侮與人同勞逸甘苦遇寒飢推共衣食赴

人緩急風雨疾病期至不爽晷刻人多願効死力色温詞摯論事多中善灼人隱而樂善諱過所譏獎人同勸阻鄉人有構者多解去既漸致富御財有義多縱弛以賑貧窮惡菲服食不邇於驕佚莫有怨妬者其後諸父以凶終諸孤淪落存者蕭然恭復撫卹之爲時婚嫁營貲產人咸難之俗俠武鬪訟恭獨延名師課子風示里中子存德爲御史疏諍廟議與儉人異同或傳至家謂禍且不測恭抗聲曰主聖臣直何憂卒不害及子爲松江守遣輿卒迎養人謂地多珍物民吏善事長官宜往饜享恭曰使吾至郡邸且閉門杜徑民吏何由見而且吾在家顧不饜享耶輿卒空還惟貽書勉以守官愛人而已年六十九卒

節王遠巖文集

林湍字其東號潑川亨泥人生十月而孤與母及女兄適呂者相依爲命幼警敏有至性孝事母而敬姊姊嘗割其埔下租弗禁已而復取租里嫗慧湍止之曰是粟林而歸呂何也湍曰女兄也卒無所問母疾朝夕侍沒以已分地營葬父所遺業二兄獨多取湍聽之急人若身有謁必竭其情以和讓睦族黨胥敬而愛之女適諸生陳墀墀沒翼寡女以立二孤內弟幼撫而成之中年家稍落躬耕自給值倭訶濱海鳥獸竄骨肉或相失盡室先之山林海島中得無害疫癘盛行其家獨免

同安縣志

卷之三十二

人物錄 獨行四

人謂德報及子舉進士爲南京部郎往視之勛以忠孝毋負其官會覃恩得封奉

政大夫子一材隆慶辛未進士累官參政

節遜菴全集

洪俊字子才號見泉少讀書不喜帖括棄去治耕父母繼歿季弟方幼兄遺孤在抱謂妻曰吾任父若任母其卵翼之以克有家有無相通鷄犬桑麻相守望歲時酒食相勞雖室罄必具食輟哺寢分襟毫無岐視值海寇棘居民鳥獸散有父執彭姓篋金百二十兩來寄以亂辭彭曰得失有命子不吾負吾亦未嘗告吾子也既受命懷篋俱臥起寇退而返之曰幸不辱命里中團結社兵捍賊鷺門有攻石者八人自南安來衆曰諜也攫其囊金去且將沈之水俊挺身持不可曰備也若之何賊之吾且白諸官矣卒還金而以八人免族有惑形家言者修父母骸襲祖塋穴事甚陰不可禦爲盟香質山靈以秘計護之卒不侵甲子正月賊猝至挈妻子避入後堡堡湫窄賊連陷沈井諸寨鍾攻堡瓦石皆震忽賊相驚呼散去則戚將軍兵至也其存亡間不容髮人謂德報子曰觀萬歷辛卯舉人金華府推官贈父

如其職

節遜菴全集

李璋字振載號象明潮州守春芳子三歲而孤母翼之年十六爲諸生旋遊南雍縱

觀金陵山水友天下士歸放浪耳目自娛散千金弗顧以母病稍斂飭然好結客浮白終日不厭每遠遊輒停舟車僦一驢周覽形勝辨其風謠土物曰以廣吾陋兼寫旅懷久之以例予上林苑監錄事秩需次二年除良牧署司課無苛署既暇益多從長者遊中丞郭維賢愛之款談甚洽出爲吳江主簿維賢贈以詩至蘇守令咸優遇之吏材敏決不懾強禦案無留牘未幾卒於官璋雖豪雋而篤倫物莊事繼母遇譙呵必介所親祖跪謝撫大宗之孫於孤幼而助之室推財多所施舍鄉人皆義之

節遜卷全集

池浴雲字仕卿號龍洲幼穎慧嫻駢語稍長失恃哀毀成禮孝事繼母友愛異母弟年二十一爲諸生名駿起初試不售卽築精舍于五老山中希跡城市得李地師卜地葬母葬時有雙鶴集其旁人謂孝感會妻病而李師被誣逮繫聞而愀然曰李君良友坐視其非辜而不自白之視貫高纒布愧矣人以內恙難之妻廉其志慙愚之曰余體稍和第行無慮竟脫李獄載與歸生平絕貴介氣亦未嘗干有司遇試皆前列再赴秋闈已收復棄歸益自奮曰吾當探石渠天祿之祕爲宇宙第一名流但以帖括家博第非傑也至建州購書數千卷還而卒業焉未幾病卒年三

同安縣志

卷之三十二

人物錄 獨行五

十四鄉人爲鑄龍洲臥岡四字於五老山石

節兪巖集

陳俊字克位號宅洲陽翟人健孫少穎嗜學與兄榮祖榮選俱以文名萬歷癸卯應歲貢越五載授福州府訓導省會送迎甚劇浩然曰吾老矣安能爲苜蓿折腰遂不赴杜門撰述以文事課子孫又十年卒俊事父母色養維謹居喪以毀名恭事二兄商質古今常至夜分雖老有讓梨意壯年喪妻矢不再娶生平慷慨好義嘗捐己以集事而不自見德寓長安有同年告窘傾囊周之惠安鄭生同貢暴卒殯而哭之哀雅甘澹泊諸子或以輕煖肥甘進亟麾去曰此非儒味所宜居恒每以無求安飽恥惡衣食懷居三章反覆誦之邑令嘉其恬守舉鄉賓子穀萬歷庚子舉人歷任新安藍山知縣

節遜卷全集

呂誠源字以漸號東浯幼喜經書古文有名諸生聞父蚤喪事母以孝聞爲人坦夷無城府臨財不苟取予處家不爲煦沫態所交皆知名士浯多倭賊徙居金門所捐金數百築東堡以護近鄉逃寇者賴之沿海漁民藉其貲營生時有所餽卻不受晚年邑令數延大賓閒一赴卒後蔡獻臣爲之銘

節清白堂稿

劉夢龍字國禎號肖沂存德子幼機穎嚮學年十二爲諸生下帷發憤有聲庠序嘉

靖戊己間海賊橫發攻城夢龍手畫備禦之策邑令譚維鼎避之又捐貲於城東築土堡爲犄角部署既定益市牛酒勸勞之民依堡得全者甚衆時父備兵潮陽檄調閩卒應募者未問貲第願得夢龍一諾蓋一日而集壯士數百人及父宦歸一切家政皆倚辦上承父志竭力洗腆無數見不鮮撫諸弟教而育之及父歿而禍作司寇洪朝選被逮死獄子伏闕訟寃謂令某與聞其事夢龍適與令善故波及之猶日夜負土襄葬事已析產甚均而挺身赴理紓諸弟之難弟夢騶竟株連褫青衿而幼弟夢松夢潮無恙卒以成立夢龍之力也及夢松既登第入仕籍乃退耕於野與田夫野老談桑麻鄉鄰構釁得其一言立解族屬有過舉正詞諭之無不改心易慮其達識敢言動中竅竅令人心折氣平晚年益遂於挫銳解紛之術善摧剛爲柔非獨其智多也年七十九卒

節清白堂稿

劉紹彥本名應兌字悅甫號秋軒汝楠孫少聰敏父授以章句輒解悟性深湛嗜思先從邑解元林奇石學繼乃入郡師李光縉別庸去慮惟與二師橫縱今古不意滿不休入庠後愈蒸蒸思奮弱冠居父喪哀戚如禮附身與棺靡不周慎家政嚴肅內外無敢抗有犯面斥之事過輒忘人憚其威而服其量撫二弟延師課督不

同安縣志

卷之三十一

人物錄 獨行六

以煢煢在疚稍爲姑息又勇於爲義周人之急顧體弱善病加以力學不輟竟無年以終光縉爲銘其墓

景壁集

柯揚字文蘊號方圃生逾月喪母又九月喪父族人利其遺貲厄危者屢賴祖母葉氏藏掖於壻家得免稍長善握算資用以饒待族人不追舊惡敦洽無間總功昆弟視若同胞慷慨好施慕尙賢豪長者如不及携子讀書郡城遂家焉曰吾故居得無虞海寇乎不數年而寇大作戚里避寇來郡者多依揚爲棲止解衣推食無所吝咸稱其智且仁旣而念莊江故居爲先世拱木之遺身後仍將葬焉乃修葺宗祠命其庶子日林居之長子日森本名一蘭隆慶庚午年舉人任孝豐知縣蔡鼎臣初名獻襄字禮謨號弼臺由諸生入大學性資英朗舉動儼飭喜恬淡不炫赫氣勢不徵逐貨利屢困於闈遂閉門潛玩凡古今文詞諸子雜書纂集抄評曰以此遺子孫吾可老矣素嚴取與而好施貧不能葬及匱乏者求無所靳以足疾卒年六十一

葉振揚字以東號寄南南陽人移居南安白石仍侍父南陽書橫經夜侍寢二十年如一日父晚病困時刻不離滌器盥衣晝夜數十更兩載不懈弟萃陽來欲均勞

輒慰遣曰我讀而扶老汝耕而養老各致其能可也枕經籍史學期致用五不逢而志益壯性方鯁不喜俗流見高髻長袖豪少年急擯之獨與同志舊游迭過從其啟迪後生重實學不斤斤佔畢出其門者多博雅知名年未四十以弟萃陽之長子先章爲子未幾復夭以弟三子成章爲子每設帳必挈以從曰三世當不負誰誦也成章萬曆壬子舉人已未進士自長洲令遷御史累贈父如其官後歷大理寺卿

節李鹿巢文集

林牧字師讓號葵洲幼能文而厄於遇孝養其親父素善宋姓每飯必延與俱父爲加七妹將嫁而難於奩具以妻奩充之父大喜二兄怡怡無間從兄以訟事繫旁郡捐貲解之嘗過族兄某見其啜茶數盃怪問故曰當午殮耳爲惻然捐餘糈餉焉又嘗見妊婦負薪亟走如廁意其產也告妻使婢視之果然爲具鷄酒食之婦得抱兒無恙歸尤折節諸名士與共有無窶人子待以舉火者爲折券每寄情於花竹魚鳥圖書詩酒間與知交酬酢勿絕家稍落不顧孫一柱萬曆庚戌進士官

御史

節清白堂稿

周仕慶號震吾治春秋明大義是非無所回護坦衷質貌無崖異谿刻之行孝友天

同安縣志

卷之三十二

人物錄 獨行七

植父嗜酒不治產仕慶奉侍維謹務得其歡心父以酒患癡晝夜視湯藥恒口爲吮之歿則竭誠盡慎治喪如禮撫幼弟得母歡析箸時次第所闔田當下流慨然以己田易之卒付波臣無所悔仲父歿無子仲母僅存季父蚤夭二孤方孩提仕慶率諸弟事仲母如母爲季父二孤鉤券簿稽疆畝井然有條課子孫讀書必次第問其所業終日抱膝趺坐口不關長短心不着恩怨無親疏少長接之以禮桀驁者卽之輒化素雖不學醫然有所知叩之必應不計單寒鄉人德之年八十五卒孫爾發萬曆庚戌進士應天府丞

節清白堂稿

蘇商霖字德說號少泉宋魏公頌之後幼失怙奉祖父撫幼弟發憤其業弱冠爲諸生逡巡矩矱大義凜然讀書好觀大意生平極慕伍員諸葛亮謂二人所處極難耳又曰凡人立志宜高中夜嘗把古人好事思量一番心便軒豁如堯舜禪受何等氣象一以天下與人一以匹夫受天下更有何物掛碍胸中念到此便覺灑然素履儉約一裘十餘年絕不經意錙銖性孝友居祖父母父母喪哀毀幾絕諱日必號慟季弟訃自粵走數千里歸其櫬仲弟歿僅遺藐孫偶遭危疾涕泣籲天願以子代卒無恙持先世積行請督學入邑志郡守朱炳如爲紀世行大書之邑人

榮焉族祠燬倡首更新未竣工而歿年五十八孫國翰萬曆丙午舉人吉安同知

節清白
堂稿

林晃字道昭號靜軒牧子生而持重慧與年進父挈眷避流賊山中獨留晃守舍露宿水餐中濕得瘧疾醫弗效築軒居之署曰靜終身無機事厄詞事父母無怠容友于仲弟翁耽無閒田產取礲确者僮指服物器用取贏敝者曰吾安而習也剛直好面折人過人知其無他皆諒之初有田十畝坐食漸耗家四壁立行一杖坐臥一榻榻爲穿無困苦意時掉臂獨吟聲出金石有侮者不與較年六十卒子一柱萬歷庚戌進士歷官御史

節遜
卷稿

周國賓字慎德幼好學既壯能文名家子爭避席國賓益健戶揣摩遜志取友顧數奇不能博一衿爲人孝友沈靜內行醇備與人交篤而有終課授有師法負牆者沒齒佩服不衰里豪伉自恣者獨畏其知得其微言善然以解恥因人熱恥襲人潤蓋視利若浼者年四十五卒以子爾貴贈文林郎濬知縣爾發萬歷庚戌進士

歷官南京兆丞

節遜
全卷

蔣懷忠字靖節號誨齋天性純篤值倭寇海濱扶父竄匿禾山父病亟倉卒無殯具

同安縣志

卷之三十一

人物錄 獨行八

晝夜號哭哀感其鄰人潘爲冒風濤越海購材佐殮喪母哀亦如之庶祖母無出婉曲承事得其歡心弟嗜酒夭歿遺孤三俱穉撫之如己子而其二同日溺海又撫其孤之孤粒粟寸布計入均賦嘗以悻直爲不逞齟齬繫於犴狴手尙書一編諷誦弗輟未幾繫解而慷慨尙義不少衰及子登第命建祖祠葺先塋值災禱告糴於廣以贍族婚喪不能舉者助之又推其餘以逮里人郡邑重其德行請爲鄉飲正賓子芳鏞

河干
集

蘇思義字文所幼讀書就童試未冠喪父事母篤孝愛二妹爲捐產治裝及字爲諸生乃輟舉子業專務爲詩與名公結社倡和陶然自適家近市時出坐肆間閱熙攘來往人盡愛敬卽有侮者遜謝不與較邑令延鄉賓辭不就年八十六卒

節清
白堂

稿府志
列篤行

吳達一字本愚號仁齋西安令德范孫六歲而孤出撫父柩入戀母側哭泣拜稽一如成人弔者奇之自是母子熒熒相依母躬訓課之坐立句讀一一稟承不敢少踰以嬉旣除服聘林希元孫女希元置之塾周旋舉止不失尺寸時與共讀較鈍敏弱冠成婚學日勤日益五應試不遇始謝儒業內行純篤事母婉愉或遇盛怒

多方勸解至鬚髮斑白猶時向牀前長跪忍飢耐寒盤餐之費日可一錢至祖父諱晨則不吝市醲擊鮮生平讀書課子杜門處惇無凌厲之氣矜飭之詞媮衣美食之奉學博將舉大賓遜謝未遑年六十九卒

節清白堂稿
府志列篤行

郭榜字廷聘號穎台爲諸生淹貫六籍而嫻於禮容周折曲中尤精於易爲諸生祭酒性真愷不問家人產產益落一蔬一褐淡如也及子貴乃謝諸生受封然猶着布素從一奚奴無少長折節下之見里中蒼頭兒則喜而摩其頂邑令延爲鄉飲大賓辭不獲而後應子夢得嘉靖壬戌進士瓊州知府姪日烜萬曆己丑進士嘉

靖知州

節清白堂稿

蘇震亨字君仁以字行一字君鼎號新郭生有穎質九歲能文弱冠以儒科第二人應省闈自是聯占高等名大譟試屢躓而閉戶下帷不少挫業亦愈工性豁達不問家人產遇物坦夷無疾言遽色居家孝友父歿析箸二弟以居長指繁多分之震亨念仲弟天絕父命輪祀恐其久而湮也乃以次子爲仲弟後而剖己之分業授之二弟議更析曰無庸也吾所受已多第令死者不替足矣何累弟爲家居苦小偷嘗一白之捕有禁囚認識所剗窗門手列數盜以報震亨叱曰老牢頭將毋

同安縣志

卷之三十一

人物錄 獨行九

藉以快讐覓利乎遂已之及子游泮乃罷諸生嘆曰科第命也吾不偶無恨獨恨負諸名公知己耳居恆以名文法帖自娛尤善古文詞詩賦歌行各窮其致書法出入顏蘇求者屢滿邑令洪世俊嘗請額五門南朱紫東鴻漸北拱秀西豐澤朝元手澤猶新年六十卒子國翰萬曆丙午舉人任浦江令陞吉安同知以浦江任內報最贈父如其官

節清白堂稿

池浴沂字士潔號三洲爲諸生試輒高等既游國學有聲故事上舍歷滿授簿丞及州郡倅浴沂不屑就而歸延師教子性爽塏不逐錐刀時與友引觴唱和以是非曲直質者片言立解親屬來謁必詢其甘苦或周其不給無少吝嗇租稅之入或後時或乞免亦曲體量給之年近九十精神愈健邑令延鄉賓不赴乃顏其堂曰

熙朝人瑞卒年九十三子顯袞癸卯舉人官同知

節清白堂稿
晃巖集合參

王三聘字允覺號莘野二接弟生而丰神英拔弱冠爲諸生嘗與蘇濬相切劘學益進事親至孝遭二喪哀毀幾不欲生倭亂後兄寄櫬劉營數奔護無所避功叔溺死爲負屍視其含殮嘗省試至橫路遇漂屍捐貲瘞之其陰所折券周人之急不可勝數督學豐城徐公行學官舉優行邑博吳炳思以三聘應時慶得人年五十

八卒姪道顯萬歷癸未進士湖廣按察使節清白堂稿

陳廷佐字時守號仰台陽翟人爲諸生試皆高等省帷不利益下帷攻苦篝燈丙夜雖盛暑隆冬不輟於文好史遷賈傳於詩好杜尤精易學合蔡陳林諸講義參伍融洽竅其奧窾間以意發所未發蔣芳鏞陳如松李雍皆執經焉課子維嚴寢食不廢及子基虞成進士乃謝罷諸生就封南雄府推官晉封南大理事評事中憲大夫順德知府邑令九延大賓閒一再赴其感觸時事多發之於詩與知友結社探韻積成卷帙性質直坦夷絕無睚眦處父母兄弟有至性嘗就外館忽心動渡海歸值父歿護侍含殮人謂純孝之報其居母喪年已及耆猶苦塊哀毀如父喪二弟早卒經理其後事復撫其孤族子弟秀者獎掖之弱者扶植之心存濟物捐貲修造便步橋歲掩骼施櫛以數十計疾疫盛行爲糜以食餓者平居乏聲色之好衣取布素器用剝敝無雜賓無幹僕青編相對一榻蕭然篤學恬修君子也年

七十有七卒節清白堂稿

蔡祚字元貴號寄南父廢疾祚鬻蔬菓爲生竭致甘旨浣滌扶掖不稍離里中有大絲役皆祚任之得其資無自肥以施人邑有寇警携子女匿山谷中分餉與同匿

同安縣志

卷之三十二

人物錄 獨行十

兒相顧恤既稍羸結客餉師無虛日鄉鄰有忿爭及爲胥吏所苦輒致至家杯酒解釋之儒術方伎匠作至鄉無不接款種秫爲酒畜雞豚種蔬果預購海錯祭祀賓客應之裕如鄉染疫其妻亦病昏暮見羣厲擁入求福有角巾白衣從後呼曰誤矣此善人家宜亟去於是羣厲皆去如煙縷穿屋上走如裂帛聲其訓子鍾有曰世間惟下人最不可爲何爲下人無廉恥者是若無所表見乃村人耳又曰吾觀爲官者官已官耳未有官民官者夫以一人受億萬人之敬奉而不能爲民造福斯已矣又殃而禍之寧得爲有人心乎又曰子孫能讀書則爲士否則農耳慎無爲胥吏胥吏者絕人與天者也又曰出債之家權子母計奇贏惟日不足人且睨其後終必貧窮以故鍾有令興國遷分水直心古道復能其官皆祚之教云參景

壁集

李霖慰字于周號東濂爲諸生授徒養親規行矩步不失尺寸讀書一守紫陽傳註爲文以發揮理趣爲工及門多貴顯其貧者不責脰脯也季終上束金於父聽其分與毫不自私與人交吐露肝膽不談人過人亦不忍欺之性恬淡不言勢利邑令高其行誼嘗以兩造就質固讓而徐以理論遣之終不令費一錢有故人宦游

千里外致書招之竟不赴事父母孝待弟友處宗黨能周給生平無嫚容遽色謙下濡忍人稱長者子獻可萬曆癸未進士戶部給事中

節清白堂稿參舊志

黃蘭芳字時薰號馨齋坂漢人少爲蘇紫溪濬所器顧不甚喜帖括年二十五父弟繼歿撫孤姪持門荼苦乃釋儒業課次子於襁褓中人咸迂之既而母妻長子俱歿產益落多外侮鍵戶授經忍唾安之及子登第次子孤姪相繼爲諸生益淡泊自持絕聲色靡麗戢子弟僮僕無預外事邑長禮請賓筵僅一赴天性孝友不競錐刀父嘗貸息於龍關遺券百餘金悉折其券海塘有魚蜆之利族人衣食其中強隣欲奪之十數載不決族益窘祀田稱貸莫應質私田充之迨事白而族苦懸糧多棄室他徙爲就祭塘中經紀其歲入祀事克修餘以佐芻輓及書香筆硯資泊阜罔市禁子弟毋得爲有族籍名索舟人束薪爲給直而詰責族子黠少年修郟恣掠海塘苗蛤適子報登第置不問與人披肝膽事有糾紛得其一言立解喜物色知名士多奇中及其人貴顯卽不復通一刺子每奉使必問途所經止與游何人節郵却饋幾何輒色喜祖姑適謝未婚而烈族叔母陳以純節着祀之家廟著爲譜外祖父母弗嗣置田宅令其族爲主祀祖姑及姑蚤喪家不能自存爲周

同安縣志

卷之三十一

人物錄 獨行 十一

恤之他戚屬賴以舉火者非一家海氛初熾携家避山谷間賊相戒無犯己已撫局再變鳩集勇敢出奇抵禦四鄉賴以免患年八十卒子仲曄改名其晟天啟壬戌進士授中書曆官御史出爲桂林知府擢南寧道在中書御史任內兩封父如

其官

節敬日草

張賁垣字擎座號吉園副使朝綱三子也爲諸生事母盡孝獨供甘旨不以累兄母病廢寢食躬湯藥禱以身代歿盡哀盡禮父赴任廣西便道過里賁垣念萬里瘴鄉不宜聽父獨往遂從入粵既而父歿於官得親含殮持喪歸賁垣先自購地於朋山之麓至是爲父擇吉形家拘房分之說不得合賁垣以自購地示諸昆交善之遂襄父葬事爲人惻幅無華絕去機械至是非一定不能阿意以徇人讀書教子而外不干餘事郡有名士必折節致之與其子相切劘焉

節恥躬堂文集

莊獻字際範嘉靖丙午舉人篤學多識爲人敦良質實溫恭有禮居鄉處人和樂無忤其在朋輩雖一日之長亦謙謙隨行不敢先遭歲荒窮乏稱貸無所吝亦不甚

責其息鄉人愛之

節材次崖文集

洪居正字季中號柏坡萬曆癸酉歲貢授武進訓導捐俸以修學宮卻贄以卹寒士

被物色者多脫穎去及子邦光登戊辰進士出守雲南謝官就封尋晉封貴州左參政有司屢延大賓間一赴之居正負奇力學文譽蜚騰歷試多首拔負篋者屢滿戶外亦多翔貴性友愛撫諸姪有恩其訓家云孝弟禮義文章節槩當吾家茶飯諸兒曹喫得飽時卽是便宜田地自壯至老言無過詞動無踰則不作氣勢不廣生殖年八十四卒

節清白
堂稿

蔡紹英字雋卿號少桂六歲而孤二母育而教之幼有至性出入起居惟命是從讀書務通大義不作書生呻吟態爲人重厚質直無詭言無飾行處昆季友恭女兄奩送來往無二視見尊長一話一動恂恂無敢先人待里隣然諾必信升斗不靳無侮者無欺人人亦無欺者里黨難平之事解忿息爭不之官而取決其一言年四十六卒堂叔獻臣銘其墓

節清白
堂稿

王高立名賢繼以字行名諸生積學勵行族中多貧窶邑徵糧急高立自出金代之輸縣令高其義表其堂曰義方後以次子覲服官封徵仕郎年八十六卒所著有毛詩小傳十六卷

王覲字正朝別號盡吾爲山東寧海州通判山東故多旱蝗歲饑則民相食覲曰此

同安縣志

卷之三十二

人物錄 獨行 十二

皆長吏無救荒之法耳因建義倉自斥千金爲之豐則積荒給於民二十四縣效焉民感其澤立祠肖像事之以廉能陞福府審理歸著家訓令子孫必同居後嗣遵守其訓至五世不衰島上稱義門

鄭師字廷肅號東石溪邊人爲人仁厚好施值年荒每糶米賑濟所全活甚多遇骷髏輒埋葬之臨終時自知死期凡親友所貸契卷悉焚之或還其人及卒北鄰皆爲持齋以資其冥福後人因號所居之處爲菜媽街孫潤中累官至大同府知府阮伯宗字一峯幼孤母守志鞠之十餘歲泛海求贏餘以養母母歿躬負土石與父合葬鷺門課子讀書風雨寒暑不少輟生平寡言笑絕交游取與不苟值峽江曾公櫻之喪患難中傾囊助之一裘三十年一履五年終身不衣帛有隆萬儉樸遺

風子旻錫

阮旻錫字疇生父伯宗字一峰世襲千戶裔世居海上幼孤泛海學賈以養母母沒躬負土石與父合葬鷺門甲申國變旻錫方弱冠慨然謝舉子業師事曾櫻傳性理學患難與共又得友曹石倉之友楊能元池直夫聞其緒論講習風雅旁及道藏釋典諸子百家兵法戰陣醫卜方技之書靡不淹貫出覽名山大川北抵京華

託處十餘載後乃逃於釋氏名超全以教授生徒自給實鄭所南謝皋羽之流著有夕陽寮詩集詩論行世林佶謂其詩冲微淡遠一以正始爲宗年八十餘卒

雁水林吉人序略孫靜庵明遺民錄通志列文苑舊志列清之隱逸未合

葉啟蕤字景芝吏部主事翼雲姪也幼聰穎力學隆武丙戌與臺灣張金棕劉顯襄同領鄉薦攝漳州通判閩亡從翼雲倡義同安城破遁跡蓮村十六載居恆鬱鬱以書史自娛語國家事輒嗚嗚哭不止康熙癸卯鄭氏亡啟蕤賫志以沒年五十

七 參家傳廈門志明遺民錄

葉迎字允受結髮從戎以勇略累擢總兵都督鼎革後杜門不出春一笠秋一綸徇

徉海上以終 參家乘廈門志明遺民錄

紀文疇字南書一字元昉後廩人年少爲諸生有上下千古之識興泉道王猷館之署焚香讀易口不及官府事與子許國從黃道周於鄴山隆武時道周薦其博學多才授中書舍人擢翰林院待詔纂聖安實錄閩潰挈家渡河從鄭成功復同安城陷以勞瘁死所著史勺三卷道周謂其論駭古昔上下三千年疑難反正盡之矣華亭徐孚遠序其涓龍詩文集以黃紀比歐蘇以許國兄弟比文忠文定時人

同安縣志

卷之三十一

人物錄 獨行 十三

謂不愧云 參廈門志遺民錄林霍續閩書涓龍堂集序

紀許國字石青文疇長子年十六爲諸生從父聽講鄴山弟子二百餘人許國最少黃道周許以掉臂獨行贈之詩曰蒼蒼千古留石青不與世界爭零星著有丁史焦書名山集拂塵集數卷崇禎壬午舉於鄉爲臨川揭重熙所得士與同榜林說林尊賢有三異人目著有同岑草一帙北都變有望燕吟一卷復從父舉義避地廈門四明沈宸荃薦於魯監國授禮科給事中不就廣平路振飛薦於永歷帝以道阻不果行鄭成功欲致之幕府亦不就與諸遺老脫粟烹芋相對歛歛爲詩文以傳之所著吾浩堂詩文集同里林霍爲之序 縣志廈門志續閩書異人集明遺民錄合參

紀保國字安卿文疇季子幼隨父兄避居廈門及長日取父兄所著遺書閉戶編輯落髮披緇攜一瓢出游五嶽林霍爲序以送其行並序其詩詩尤清雋絕俗飄飄如其人 續閩書明遺民錄

莊潛字伏之紀文疇弟子與紀許國林霍善相與扁舟攜詩登虎巖入吳庄放歌月下獨攄孤憤進士沈佺期雅推重之潛意欲纂述舊聞以耳目親記不及徧覽中州事跡偶得遺聞數卷遂編纂宏光逸事繼以詩歌名爲石函錄紀許國爲之序

林霍字子濩號滄湄橄欖樹人生明季食貧讀書博洽能文好結交當世名人以氣節自期許詩文著述甚多尤究心聲韻之學問詩於盧若騰徐孚遠姚翼明亦推為秀出紀許國序其所著詩謂如空山發翠馨香不絕別留神韻於筆墨之外自丙戌秋往來虎溪鶴嶺間與紀許國稱莫逆交欲師事之許國曰某不敢擁皋比如黃魯直之於子瞻少游足矣相期許如此稱遺民終身所著續閩書皆鼎革時海內名流不肯失節者又著有雙聲譜鵬亭詩草滄湄文集滄湄詩話荷樓詩選

舊志廈門志紀氏藏稿明遺民錄童蒙求林子濩紀略合纂

陳則賡號錫墀郡諸生長史則采弟聰敏多智泰昌庚申紅夷窺中左所則賡以計靖之天啟二年壬戌復至總兵徐一鳴率師來廈則賡贊畫軍門謂夷性反覆宜剿撫並用乃詭詞議撫尅日出家貲募敢死士椎牛酒置毒入夷舟遍觴之且曰今日互市成中外胥福盍姑盡醉夷喜飲則賡急下小艇趨舟師挾所製油蓑直撲其艦乘風縱火夷衆殲焉臺省交章論薦敘功第一予官不受並不赴舉聞豪放山水間以老孫國倫康熙三十五年丙子舉人府縣志陳家譜增纂

同安縣志

卷之三十一

人物錄 獨行 十四

林志遠字致子號陶菴大梁孫萬曆戊午年二十六舉於鄉力學博聞勵志弗衰九上公車崇禎癸未始成進士授工部主事假歸甲申後奉母結茅清谿仙峰嶺不復出人稱陶菴先生年七十二卒著有歷代史白舊志

楊期演字則龍號克齋博涉書史尤工古文崇禎三年庚午舉人甲申後與父廩生師瑄杜門不出讀書安平山寺唐王召為兵部主事及唐王出延平期演追赴不及辛丑以後僧帽道披晦迹後溪村日惟垂簾閉戶校讐經史爨火屢空泊如也每歲遇春秋佳日陟山巔北望酌酒遙拜繼以痛哭聞者憐之卒年七十餘著有易經管見島上紀事子秉機元孫宗潮俱庠生舊志家譜參

楊秉機字允中崇禎邑諸生期演子國變削髮為僧自號鷺島遯人北抵金陵上京師蒼茫弔古若不勝情乘興游岱嶽意趣甚豪思欲窮覽寰中形勝以行路既艱屢變姓名間關賦歸深自韜晦胸既積有磊塊感事懷人一寄於詩天津西望云海氣連孤塔波先壓古城舟泛浙江云雲收千章立水漲萬山高即事云馬蹄遲積雪木末接遙天憶游云銀河倒瀉乾坤小滄海騰浮日月慵渡揚子江云北固斜連平樹浸金山中立信潮分抵儼石云倒攜如意歌新曲每著征衫語舊知廿

八都云茅店更新留晚酌野橋依舊送歸蹏又有笑人爲氣候認我是江山之句
寄意遙遠所著有浩然小草集本

林嘉采字景則應翔次子崇禎十五年壬午順天舉人留心理學國變後韜晦嘗謂
其甥鄭得瀟曰士貴立品與聖賢俎豆相映對尋常青紫不足艷也其高潔如此

廈門志

葉后詔中左所人爲諸生屢試冠軍崇禎甲申應歲貢京師陷未廷試而歸以詩酒

自娛與徐闇公鄭牧仲輩爲方外七友後渡臺著鷓草五經講義行世府縣志

李樹官字石臣偕阮旻錫築館於城南廢圃屏絕人事取先儒傳注語錄與有明二

百餘年紀載及先輩評訂者沈酣浸漬數年業大就博極羣書尤工古文詞素慷

慨負奇節獄獄不可下諸貴介頗願納交皆叱而遠之以故布衣蔬食終其身困

厄年四十有四而歿

舊志

清

王士豫字立先積善白礁人當海氛播遷時盜賊充斥士豫鳩其宗族僑居浦頭鄉
出已貲築二土堡據高崗爲犄角勢日練鄉勇紀配整肅寇莫敢犯衆賴以安年

同安縣志

卷之三十二

人物錄 獨行十五

六十舉賓筵子象雍正壬子舉人孫聯魁拔貢生

陳雲初在坊里東門外保東橋人生平仗義好善樂施順治戊子年鄭成功陷同安

雲初不惜傾貲收斲瘞體置封樹焉時邑宰鄧麟采表其閭舉爲鄉飲賓卒年六

十有六

王良字遂侯號毅菴居晉江隨征臺灣功加左都督職銜值邑令清復銅魚古蹟計

費浩繁良慨然任之又施櫟於縣城建朱文公祠於其鄉子天慶貢生知縣觀濤

康熙辛丑武進士斌康熙辛卯武舉人任海壇守備乾隆元年以長子天慶貴贈

如其官

陳維衡字季璇永華三子年二十爲諸生有學行漳石美有祖屋舊址附近黃姓貪

其地謀於衡曰君祖屋廢不用宗人皆碌碌請爲君求之私奉三百金不然將強

築此地以千金爲訟費此地終非君家有也衡拂然曰若然則祖地席捲而去宗

人皆碌碌某遂得爲錚錚乎遂白於官越年兄夢球以翰林奉勅巡海有司審實

將按黃罪衡復請曰某於黃爲同鄉只求斷歸原主不願推究其罪既出諸從子

皆憤以叔爲癡衡曰是非汝所知也盛衰有時今日何難盡法後日可長保耶是

時黃自分禍且不測竟得免感激難名踵門叩謝自是相敬愛數十年莫敢窺伺
維衡居家端重終日無疾言遽色宗族親友皆雅重之節家傳

陳孝宗字長美一字兆宏先居海澄青浦以海氛避地徙廈門遂爲同安人孝宗弱
冠失怙習計然術行已以忠實爲本不苟然諾鄉里交相信重外島遠夷聞其名
以貨來者爭投託焉自是貲漸進事母盡孝五十而慕青浦祠燬於寇倡族重修
春秋致祭幼寄養謝從龍家從龍客死永春躬往訪求其遺魄歸葬以時祀之母
舅無子爲擇承祧資其婚娶以至成立青浦族人往來無虛日款接不倦與人交
有始終周人之急無吝遠近稱爲長者有司察其行誼延爲鄉賓年五十九卒節近

道齋文集

吳曾芳字孫若號愧菴由邑諸生領康熙丙午鄉薦庚戌成進士爲文翻經談理隳
括合度聲華爛如性至孝出於自然父母稱之無異詞侍親怡聲下色父少恙則
魂寐不安三餐茹歎偶失調度則憂形於色晴陰愉拂拊摩慰藉務使體適而心
懽胸無宿物喜慍隨觸過而輒忘與人交見肺腑代謀必忠隱惡揚善聲色睚眦
皆理遣不圖報坦夷無崖岸而不爲破節事姿識通朗善察情僞曉事機而能持

同安縣志

卷之三十一

人物錄 獨行 十六

大體不爲錙銖小黠卒於京同年李光地爲其行狀

節王裕村集

王朝俊南澳遊擊康熙庚申邑大饑俊買米入百石煮粥分濟仍每日人給米一升
全活甚衆

蘇未觀積善里人康熙庚申往永春販布是夏穀貴斗米一金未觀將資本盡數散
賑又施糶百具以殮餓殍永春載之邑志廈門新路渡頭壞捐貲修葺又倡修深
青橋行人便之

劉彭齡霖任子爲諸生有文名勇於爲義樂善不倦事父母得其歡心以一經教子
子運昇康熙庚申補科舉人平和教諭

陳御飛字克龍諸生陽翟人嘗捐田以通水利立石以表孝節施棺木修橋梁康熙
二年浯島播遷周給族戚鄉閭義之

金友原姓張同安人康熙庚申補戊午科舉人授仙遊教諭告養歸足不履公庭訥
言敦行士林重之錄府志補

陳王春字伯元由監生捐州同職銜孝親睦族建祖祠置祀業尙義好施助設育嬰
堂倡建縣堂重造南門橋塔塘橋又自造積善里英溪寧濟後埭三橋行人利賴

督撫學使郡邑長各給匾獎焉卒年八十五

陳錫英陽翟人摯於天性有女兒已適夫遭家板蕩徙居郡城父母憂之錫英時饋遺於百數十里外徒步往返未嘗諉勞後并挈其家以歸數年頓復其舊業再從兄嫂王氏四世俱單氏孀居苦節所撫孤二貧不能生思鬻少者以養長者錫英憐之割以膏腴田付之耕不納其租併代輸糧以全其子母族里稱歎比之范公義田云

林芳德捐職州司馬嘗捐百金修梵天文公書院倡改嶽口理學名宦石坊施棺十年費以千計所居馬家巷有通利廟爲朱子簿同時所題芳德重新之復於其後倡建祠閣以祀朱子計費五百餘金邑令張荃立牌記之

周廷樑事親克供子職撫弟姪友愛無閒祖祠傾頽獨力修建族姪貧乏者加意存卹鄰里喪葬極力扶助遇歉歲寬田丁租入貧者卽爲破券橋路廟宇隨力捐修雍正十年舉應鄉賓乾隆二十二年以子岐德遵例急公贈中憲大夫

黃錫時字奕中號砥園積善里錦宅人明大義以家貧棄舉子業爲貨殖計漸饒性寬和樂施予慕范文正義田遺規捐千金置產宗祠以資族之讀書孤寡無所賴

同安縣志

卷之三十二

人物錄 獨行 十七

者其族人黃濤方建華圃書院錫時念院中膏火不敷先後共捐七百餘金以資生息爲經久計而土木之興實董其役寒暑不輟者三年工竣積瘁而卒年六十九以遵例急公請旌焉

呂文遇字雲友號樸齋東門外人植品端方弟失怙恃撫養成人及弟歿視遺孤如已出其於宗族親朋尤能解囊周卹人以是義之

李擎輝字角英號瓊齋由國學生捐職州司馬積善里金墩人幼失怙事母與二兄內外無間言以勤儉振其家親屬有夭折者輒分貲財畀其婦使得全節嘗與魏彝玉交財彝玉遺算二千金逝後查晰人無知者輝卽還其婦人皆義之邑人創建華圃書院輝捐金助成之又以院中膏火不敷復捐金以生息置產爲延師育材計合前後共捐八百金其有功於書院者甚大昌平宮詹陳浩作傳稱之

陳夢熊字士希號松軒貢生在坊里溪邊人胞姪寧世四歲而孤時已析箸夢熊體父母志推食解衣視同己子復爲延師督課越甲子寧世登黌書族人以是多其德焉又性慷慨勇於爲善 文廟前庭蕪廢樵星門壞皆捐金修葺又修嶽口大路至義娘廟前修營後鄉及蔡宅小橋行人便之眞君廟龍虎宮亦俱踵事增華

乾隆丁卯年鄉大疫施棺一年貧民之不能殮者得免暴露邑中以高義稱之
陳秉義在坊人捐職同知幼喪母事繼母盧氏克盡孝道能得其歡心及父歿侍奉
其祖起居飲食惟謹家三世同居合指數百祖以秉義能諸事悉委其經理井然
有條嘗擇地西郊外建支祠以安先靈又捐貲修建書室多蓄經籍廣置書田延
名師以教督弟姪如洪簡祖武捷春邁倫光桓等游黌序登賢書者數人皆其力
也有叔氏時涵年相上下事之不異於父凡事必稟命而行與堂弟亦怡怡終日
誼若同胞宗族戚里或有不浹者得其一言立解蓋由其孝友誠懇素孚於人也
以壽終安溪太史官獻瑤南安太史洪世澤皆爲之傳

陳邦寶字璞卿捐職布政司理問少躬耕養親門內藹如旋客浙江甬東值歲荒民
艱衣食邦寶製綿衣分給復於通衢煮粥賑饑當事令邦寶倡捐兼董賑事遂首
捐重貲作倡並分頭勸諭捐賑凡向義捐輸者大書其名於公所壁上註明捐數
若干人競感動樂輸全活者甚衆後乾隆庚午甬復大歉時邦寶已歸里矣寧台
紹范觀察訪其遺法踵行之民困以蘇郵贈匾積厚流光旌之居鄉施與無吝族
戚多藉周卹當事建玉屏書院置育嬰堂皆捐輸倡首雅有樂善好施之風

同安縣志

卷之三十一

人物錄 獨行 十八

陳思敬字太初副貢生乾隆癸酉重修貢院思敬樂捐三千金又建寨仔山義塾倡
修文公書院遠近咸稱高義子鳴珮廩貢生龍溪訓導

王瓊林字玉崙號輝山靖山頭人嘉慶二十三年舉人教授鄉里多成名者巖靜而
和辭受取與間斬斬不苟豪富家非其親故十邀不獲一面非公事不涉足有司
之庭生平不狎毀人人亦無毀狎之者卒年五十二

呂世宜撰傳

高育茂字植萬號樂園職監性淳樸好施與雍正癸丑洪水爲災流屍遍野育茂施
棺殮埋鄰里窮乏稱貸不吝建宗祠修譜系從姪華松少穎異育茂器之視同己
子延師課督後由千總挑入侍衛補崖州營參將陞春江副將署理總兵族人咸
爲育茂之力也嘗謂其子以彰曰凡有義舉量力助成以彰凜遵遺訓乾隆癸卯
捐建奎星樓癸丑倡修崇聖祠朱子祠乙卯建輪山紫陽書院嘉慶丙辰改朝元
城門清銅魚古蹟以彰又命次子邑諸生有繼倡修文廟明倫堂協輯邑志命三
子國學生玉成修城垣浚河溝義聲著於四方督憲魁公嘉其義賞以彰袍掛銀
牌邑令吳堂爲立傳并建坊旌之四世同居食指六百餘不畜婢僕世咸稱焉子
孫蕃衍多入雍庠

童重器字廟華號榕亭捐職州司馬在坊里月眉池人平生樂善好施外祖父卒於臺灣重器體母志渡洋護櫬歸葬又城東回祿近地獅開口積樞延燒骨殖支離施棺殮埋鄉鄰貧乏賙貸罔吝姪婦葉氏青年孀守重器加意撫慰以成其節年六十八卒子浚德乾隆戊申舉人孫開勳庠生

陳廷振字敦遠國學生六歲方在塾聞大父歿擗踊而歸哀毀如成人父母昆弟間未嘗有拂意乾隆五十二年涪州饑載米卹其族人明年疫施糶五百具子榮瑞號雪舫以廩生爲龍溪訓導道光元年舉孝廉方正

廈門志

顏丹書字蟻蝮號敬銘在坊縣後人少孤家貧事母至孝以勤學鼓篋蜚聲巽序兄弟友愛甚篤相與經營商業家道日隆同治初由軍功保舉訓導歷任歸化永福儒學歲科兩試概不受贄每月集諸生校藝勸勉備至士望翕然及賦閑喬梓竹林一堂濟濟延師教督多所成就性慷慨好施戚友告貸無力償還者輒焚其券子籛南姪俊皆入泮

張添字怡和世居澣井鄉少貧家無屯積兄弟五人添居三竭力農事頗有餘裕及添壯復業商四十年後家計小康五十餘歲而九男三女性好施親族中有求助

同安縣志

卷之三十一

人物錄 獨行 十九

者不少各持家勤儉有法子姪輩同居盈百無閒言至敦宗睦族排難解紛靡不勉力爲之享壽八十四歲卒之日子孫執紼者計百廿餘人

許希仁訪稿

葉時泰字錫爵蓮坂人七歲失恃父客異域廿五年絕音耗庶母黃太恭人鞠養之束髮就傳慧敏敏學性至孝偵父所在間關迎歸晨昏溫清滫瀡旨甘之供必誠必潔自以非庶母無以成立所以事之者尤謹居喪哀毀無節慟不欲生年雖耄遇朔望必展親墓徘徊悲涕累日不忍去鄉人恒樂道之以爲子弟勸生平勇於義事戊申大水雙涵長堤坍塌數百畝桑田幾變滄海時泰催役急攜畚鍤運土石剋期完善民賴以粒嗣又修祖廟造塔於雲頂巖解嘉禾山械鬪凡所經畫井然秩然咸豐癸丑廈門會匪搆難攻掠城邑時泰時率團勇爲官軍援擊賊於金榜山破之事平獎加五品銜賦閑家居年躋大耋精神朗朗如壯歲蒔名卉養佳禽翛然有塵外想以子貴封奉政大夫翰林院編修加四級卒年九十五子有年邑廩生大韶候選同知四品銜大年光緒戊子舉優行第一旋捷鄉會官編修

蔡仁撰墓志

陳澆字超然號謙敏溪邊人襁褓失怙四壁蕭條性至孝作小負販以供母及壯游

廈門司馬鄭雲襄奇其才派司茶稅局會計以廉能稱旋辭局務服茶賈推廣南洋商業遂以懋遷起家生平尊師重傅喜與學士文人相來往以此多慷慨好義事咸豐初年會匪滋擾滄絡鄉社扼險守禦一方賴之以安鑾井風俗樂戰鬪動以火器斃人每捐貲調停爲其息事邑天花痘盛行嬰兒多殤滄倡款設牛痘局於西亭風行一時孩提賴以全活者頗衆山東災屢捐賑恤奏獎五品同知銜及樂善好施匾額其好善有如此者壽六十有二卒子瑋舉孝廉方正孫永思邑

庠生

摘傅炳
鍾墓志

曾鑄字少卿城內北鎮宮人祖式欣移家滬上遂居焉鑄讀書能明大義十一歲誦毛詩至衛風問師曰戴公文公復國中興應入太廟不識於公之父母將安置之師奇之而不能答嗣以寇難棄讀就賈居恆服膺寧陵呂氏故其操守行誼多與之合間復作畫涉筆成趣菰蘆秋雁栩栩欲生性慷慨好施親友之待以舉火者恆數十家賑濟鄰省捐助善舉無不慨發囊金光緒十八年山東等省有災疊次助賑該省巡撫爲彙案詳請獎給藍翎鹽運司銜又於安徽晉邊助賑獎換花翎二十三年江蘇淮徐等處以水災助賑兩江總督會同江蘇巡撫詳請獎給二品

同安縣志

卷之三十二

人物錄 獨行 二十

封典二十五年建義莊宗祠學塾於太倉州嘉定縣江蘇巡撫鹿傳霖据州縣布政使司之請按例奏給樂善好施旌表建坊其題本有云師希文瞻族之規效周禮睦婣之訓觀其慷慨好義洵足矜式里閭等語再數年美洲人虐待華僑在上海首倡抵制美貨不與交商登高一呼萬山皆應美人請中政府欲加害之鑄提倡益力其見義勇爲不避艱險有如此者後每因交涉失敗我國人皆能以抵制爲政府後盾鑄之力也鑄卒於滬上子澤霖上海縣諸生

上海志
稿合參 奏

論曰我國爲世界最大商場無論何國皆欲於條約上爭佔勢力以爲通商利益計交涉之失敗由來已久而我國人卒能一心抵制以團結力爲立國之精神非鑄倡始之功不及此

蘇國鑄字梅卿號月船幼聰穎勵志讀書不預外事年二十入泮益規行矩步言笑不苟光緒己亥年戴學憲按臨科試拔第一其弟萬靈第二均有聲譽序國鑄性孝友父母昆弟有疾必晨昏侍側無稍離生平與邑諸生余玉書許玉山李春臺林玉堂最友善皆醇厚謹飭之士也以此鄉閭每推重之光緒末季地方多盜被公推爲團練總董恆以才不勝任勉勉勤勤里閭安肅丁內艱慟哭幾不欲生旋

得病輾轉牀席者月餘以先人窀穸未安心常警惕冒暑游山擇地疾作不勝喪

而卒年四十有三

蘇家乘
倪炯采

胡鉉字鼎三訓導友梅子銅魚館人未弱冠卽能書尺餘大字有四方之志遂游上海天津北京廣東及江浙年二十餘適值友梅商賈失利挾貲七白金赴香港不數年堆黃積白遂成鉅富性至孝友梅官福州每歲必省親數次恆以不得長依膝下爲憾事無鉅細必請於父母而後行所入貲必均諸弟無少吝舉凡睦內族篤外姻力所能爲悉致之親屬中有可造就者輒極意扶持俾克成立邑濱海有水旱輒請堂上平糶賑給悍鄉械鬪死傷人命數十甚奇慘多年不能解甫聞知卽躬出調停解囊賠資以息其禍辛亥光復盜賊充斥溪船苦之乃請於官出已財設義勇隊緣溪梭巡晝夜保護行旅以安梵天寺毀爲捐貲修之牛疫作慮傳染爲買而沈諸海慮婦科穩婆接生未周爲設女醫局以調劑產婦義聲所至遠近同稱著有椽筆樓初集二卷以民國丁巳卒年五十一

參柯榮試
撰墓志

顏文禡仁德里港頭鄉人僑商南洋迨三十餘歲回梓采風見其鄉無識字者心焉憫之於是倡設私塾所需經費禡自籌畫鄉設煙賭又竭力勸除祠宇有損壞者

同安縣志

卷之三十一

人物錄 獨行 二十一

僱工修築族中有貧而無賴者禡按月幫助自奉甚薄未三年突聞其父在南洋病篤禡卽買舟速赴侍奉湯藥晝夜在側未嘗廢離父歿卽親運父柩回梓安葬年五十六卒